

Ilaqutariinnermut Peqqissutsimullu Naalakkersuisoq

Landsstyremedlem for Familier og Sundhed

Atassutip Inatsisartuni ilaasortai

Inatsisartut

Namminersornerullutik Oqartussat

§ 36, imm. 1-imut akissuteqaat ilaqtariinnik paaqqinnittartunik akuersisutiginnittarnermi apeqqu

Allakkatigut 11. januar 2008-imeersutigut Inatsisartut Suleriaasianni § 36, imm. 1 naapertorlugu apeqqutinik ukunanga Naalakkersuisunut saqqummiussaqaarsimavusi: 1) Meeqqat angerlarsimaffiup avataanut inissineqartussanut sivikinnerusumik sivisunerusumilluunniit tigumminnittussat/angajoqqaarsiassatut toqqarneqartartut/akuerineqartartut piukkunnassusaat qanoq misissuiffigineqartarpa? 2) Tarnip pissusaanik ilillisimasallinnit nalilerneqartarpat? 3) Piumasaqaatit naammappat imaluunniit sukaterneqarnissaannut Naalakkersuisut pilersaaruteqarpat?

Apeqqummut 1-imut): Meeqqat angerlarsimaffiup avataanut inissineqartussanut sivikinnerusumik sivisunerusumilluunniit tigumminnittussat/angajoqqaarsiassatut toqqarneqartartut/akuerineqartartut piukkunnassusaat qanoq misissuiffigineqartarpa?

Nalunaarutigisinnaavara, angajoqqaarsiatut akuerineqassagaanni pinerlussimasut nalunaarsuiffiannit takussutissiamik aamma peqqissuunermut uppersaammik takutitsisoqqaartarmat. Angajoqqaarsiatut akuerineqassagaanni minnerpaamik 18-inik ukioqalereersimasuusariaqarpoq. Kommunalbestyrelsip nalilertarpaa, angajoqqaarsiat angerlarsimaffiat peroorsaariaatsikkut, peqqissutsikkullu illersorneqarsinnaanersoq. Taamaalilluni kommunalbestyrelsi ataatsimoortumik nalilersuisarpoq, angajoqqaarsiassatut qinnuteqaateqartut naleqquttuunersut, tassani ilanngunneqartarput qinnuteqaateqartup tunuliaqutigisaa maannakkullu inissisimanagera, qinnuteqartup nukissaqassusia, ukioqortussusaa, angerlarsimaffimmi avatangiisai il.il.

Suliani ataasiakkaani tamani kommunalbestyrelsip aalajangertarpaa, meeqqat paarineqartussat qassit angajoqqaarsiaasunit isumagineqarsinnaanersut.

Angajoqqaarsiat pillugit malittarisassat nassaarineqarsinnaapput Meeqqanik inuusuttunillu ikiorsiisarneq pillugu Inatsisartut peqqussutaanni nr. 1, 15. april 2003-meersumi kingusinnerusukkullu allannguutaasimasut ilanngullugit aamma Meeqqanik inuusuttunillu ikiorsiisarneq pillugu Namminersornerullutik Oqartussat nalunaarutaanni nr. 32, 14. december 2006-imeersumi.

15.01.2008

J.nr. 42.20.02

Postboks 260

3900 Nuuk

Oq/tel +299 34 50 00

Fax +299 32 45 47

ilapi@gh.gl

www.nanoq.gl

Apeqquut 2-mut): Tarnip pissusaanik ilisimasalinnit nalilernerqartarpat?

Kommunalbestyrelsi nalilersuisartuuvoq qinnuteqartut angajoqqaarsiassatut naleqquttuunerinik. Piumasaqaatinik aalajangersagaqanngilaq kimit taamatut nalilersuineq isumagineqartassanersoq. Ilaqutariinnermut Pisortaqarfimmit ilisimaneqarpoq, kommunimi meeqqanik inuusuttunillu sullissisoq, qinnuteqaateqartunut ornigulluni ilaqutariit angajoqqaarsiassatut naleqquttuunerinik nalilersuisartuuvoq. Tamatuma kingorna sullissisoq inassuteqaateqartarpoq, taamaalilluni qinnuteqaateqartunik nalilersuinermit amerlanerusut peqataasarlutik, angajoqqaarsiassatut akuerineqarsinnaanerat sioqqullugu.

Apeqquut 3-imut): Piumasaqaatit naammappat imaluunniit sukaterneqarnissaannut Naalakkersuisut pilersaaruteqarpat?

Naalakkersuisut angajoqqaarsianik akuersissutiginnittarnermi malittarisassanik allannguinnissamut pilersaaruteqanngillat. Naalakkersuisunilli tamatigut maluginiarneqartarpoq, malittarisassat pitsaanerulersinneqarsinnaanerat Atassummiillu saqqummiunneqartut Naalakkersuisut siunissami meeqqanik inuusuttunillu suliniarnerani ilaatinneqassallutik.

Naalakkersuisunit pisariaqarsorineqanngilaq, tarnip pissusaanik ilisimasalimmik angajoqqaarsiannngorumaartussanik nalilersuisarnissaq. Taamatut piumasaqaatip aamma akuersissutiginnittarnermi sulineq malunnaatilimmik kinguarsarsinnaavaa, tassami kommunini tarnip pissusaanik ilisimasalinnik annertuumik amigaateqartoqarmat.

Naalakkersuisut pilersaaruteqanngillat angajoqqaarsiatut akuerineqarsinnaanermut ikinnerpaamik qanoq ukioqqortutiginissamut killilersuinissamik, qaqugukkut angajoqqaarsiatut akuerineqarsinnaanermut. Qanoq ukioqassuseq kommunip angajoqqaarsiannngorniarlutik qinnuteqaateqartunik nalilersuisarneranut ilaareerpoq. Soorluttaaq tamatigut periarfissaqartoqartariaqartoq, qatanngutip angutip arnarluunniit utoqqaanerusup, assersuutigalugu 20-inik ukiullip, angajoqqaat toqusimappata qatanngutiminik mikinerusunik paarsisarsinnaanissaa.

Naggasiullugu oqaatigisinnaavara, Naalakkersuisunit pissutsit meeqqat inuusuttullu atugaat isiginiarneqarmata angajoqqaarsiaasartullu tungaasigut pitsanngortitsinnaanermut periarfissat isiginiarneqarmata.

Ikinngutinnersumik inuulluaqqusillunga

Arkalo Abelsen